


TEZAUUR LITURGIC
18 DECEMBRIE

ACATISTUL
SF.IERARH-MUCENIC
TADEU
USPENSKI,
ARHIEPISCOPUL
TVERULUI



MOSCOVA, 2000



Акафист священномученику Фаддею

Кондак 1

Избранного от Бога на высоту святительского служения, молитвенника изрядного и чистоты православных веры ревнителя, Твери града и всея земли Российския небесного заступника, новаго чудотворца предивного вси воспоим:
Радуйся священномучениче Фаддее,
молитвенниче о душах наших!

Икос 1

Ангел пресветлый явился еси на земли,
преблаженне Фаддее, тихостию нрава и
смирением украшен, издетска Господеви
угождати желая, сего ради вопием ти:
Радуйся, иерейскаго корене ветвь пречестная,
Радуйся, от святых купели славным именем
Иоанна Дамаскина нареченный;
Радуйся благочестивых родителей кроткое
утешение,
Радуйся благоговейное верных удивление;
Радуйся, чадо послушания, в страхе Божиим
возвращенное,

Радуйся, отроча чистое, во храме Господнем
воспитанное;
Радуйся, от сродников и знаемых благочестию
наученный,
Радуйся, благим нравам, вере и любви оных
подражателю;
Радуйся, священномучениче Фаддее,
молитвенниче о душах наших.

Кондак 2

Видяще твое по Бозе усердие, удивляхуся вси,
како в мале премудрость Божию познавши,
возжада душа твоя источника приснотекущего,
от негоже верных сердца благодатию
наполняются и немолчно восхваляют Бога:
Аллилуйя!

Икос 2

Разум неуразуменный уразумети потщався,
востекл еси, блаженне, под кров преподобного
Сергия, не в суетных и тленных поучатися, но
Господа лицом к Лицу узрети желая, сего ради
вопием ти:
Радуйся, от пелен архиереем пророчески
нареченный,
Радуйся, несумнительно путь служения
Господеви избравый;

Радуйся, неуклонное шествие ко Христу от
юности в сердце своем положивый,
Радуйся, душу свою невредимую от ветров
безбожных учений сохранивый;
Радуйся, в терниях и волчцех пшеницу веры
Христовы возрадивый,
Радуйся, плод сторичный Владыце Христу
принесый;
Радуйся, ближним поработати пламенне
вожделевый,
Радуйся, о души бессмертней присно попечение
имевый.
Радуйся, священномучениче Фаддее,
молитвенниче о душах наших!

Кондак 3

Силою свыше укрепляем, выну болезнуя о
спасении души своея, добрых учителей искал
еси, по слову святых отец, яко неудобь спасается
без наставника к Богу шествуяй, и обрел еси
оных, яко многоценное сокровище. Тех
богомудрым поучением прилежно внимал еси,
Богу благодарственно поя: Аллилуйя!

Икос 3

Имеяй непрестающую болезнь в сердца своем, в
кий бо час услышиши глас "Се Жених грядет"
недоумея, светильник свой присно горящий

уготовал еси, елеем благодати преисполнив сего.
Мы же, части мудрых дев улучшить желая,
воспеваем ти сице:
Радуйся, постниче, себе Христа ради утеснивый,
Радуйся, вина от юности никакоже вкусивый;
Радуйся, древним отцем пустынным измлада
подражавый;
Радуйся, противу страстей душепагубных
подвизавыйся;
Радуйся, любви исполнение стяжавый,
Радуйся, семена греха непрестанно из сердца
своего исторгавый;
Радуйся, помысел возношения самоукорением
низложивый,
Радуйся, смирением гордую выю помыслов
суетных сокрушивый.
Радуйся, священномучениче Фаддее,
молитвенниче о душах наших!

Кондак 4

Бури помышлений сумнительных возмущаша
душу твою, о доблий воине Христов, егда
служити Богу и ближним всем сердцем возжелал
еси, о стези же монашестей недоумевая, молился
еси Богу со слезами: "Скажи мне, Господи, путь,
в онъ же пойду, яко к Тебе взях душу мою," - поя
Ему с надеждою: Аллилуйя!

Икос 4

Слышавше от праведника Кронштадтскаго,
егоже яко ангела земнаго узрел еси, словеса
Христовы: "Аще любиши Мя, паси овцы Моя...",
уразумел еси волю Божию спасительную. Сим
предречена бысть и мученическая кончина твоя,
еюже увенча тя Господь, сего ради вопием ти:
Радуйся, в день Успения Пречистыя Владычицы
в воинство Ея вчиненный,
Радуйся, дивным смотрением Божиим имя
апостола, во младости предреченное,
получивый;
Радуйся, небесное ангельское звание паче всех
земных возлюбивый,
Радуйся, Бесплотным силам во всем
уподобиться возжелавый;
Радуйся, благодатию священства почтенный,
Радуйся, благоговейный Престола Божия
предстоятелю;
Радуйся, научение юных аки святое послушание
восприявый,
Радуйся, в подвиге любви и попечения о пастве
твоей пребывавый.
Радуйся, священномучениче Фаддее,
молитвенниче о душах наших!

Кондак 5

Яко звезду боготечную, путь верным
указующую, воздвиге тя Пастыреначальник на
тверди церковней просветити мрак неведения и
привести Господеви люди совершенны, да
радостно вси воспоют с тобою Богу: Аллилуйя!

Икос 5

Видеша людие талант пастырства добраго,
дарованный ти от Господа, егоже не яко бремя
тяжкое восприял еси, но яко иго легкое понесл
еси, любовью вся покрывая, ничимже
смущаяся, на Господа твердое упование имый;
мы же, дивящиеся, вопием:

Радуйся, Пастыря кроткаго дивный
подражателю, Радуйся, небесному покровителю
твоему подобниче; Радуйся, апостольское
дерзновение имевый,
Радуйся, об Отечестве твоём, тьмою неверия
покрывающемся, скорбевый;
Радуйся, о рассеянных по путем погибельным
присно болезновавый,
Радуйся, на зов твой текущих с любовью
приимавый;
Радуйся, яко обида и памятозлобие от тебе
далече быша,
Радуйся, яко превыше немощей человеческих
пребыл еси.

Радуйся, священномучениче Фаддее,
молитвенниче о душах наших!

Кондак 6

Проповедует земля Волынская подвиги и труды
твоя, святителю Фаддее, яко истинною смертью
для мира и гробом себялюбия архиерейское
служение почел еси, неуклонно шествие ко
Христу творя и воспевая Ему присно: Аллилуйя!

Икос 6

Воссия свет святительскаго служения твоего, о
пастырю неусыпный, снедаше бо тя огонь любви
ко Христу. Возжада душа твоя благодати
Божией, о Господе хвалиться научающей:

"Пшеница Божия есмь," - яко Богоносец
восклидая. Мы же, видяще таковое усердие
твое, воспеваем сице:

Радуйся, наречение в день священномученика
Игнатия приявый,

Радуйся, сему Богоносцу любовь ко Христу
уподобивыйся;

Радуйся, славы суетныя на земли не взыскавый,

Радуйся, совершенный образе чистоты и
смиреномудрия;

Радуйся, омофор яко крест на рамена своя
возложивый;

Радуйся, Архерею Великому, небеса
прошедшему, последовавый,
Радуйся, благочестие свое, яко жезл для овец
словесных, имевый,
Радуйся, яко глава твоя увенчана бысть венцем
долготерпения.
Радуйся, священномучениче Фаддее,
молитвенниче о душах наших!

Кондак 7

Хотя явити всем красоту веры Православныя,
неустанно трудился еси, да люди новы Христу
приобрещаши, кротостию и тихостию нрава к
себе привлекая, выну поя Богу: Аллилуйя!

Икос 7

Новаго тя Златоуста показа Человеколюбец
Христос, неусыпно бо вертоград Господень,
знюем безбожия иссушаемый, животворною
влагою словес твоих напоял еси. Сего ради
вопием ти:
Радуйся, от Источника воды живыя верных
напоющий,
Радуйся, светильниче светлый, путь спасения
нам озаряющий;
Радуйся, плотскаго мудрования до конца
отвративыйся,
Радуйся, Писаний Божественных изъяснителю;

Радуйся, о просвещении истиннем радевый,
Радуйся, очи сердечныя отроком учением твоим
отверзаяй;
Радуйся, юныя души на путь спасения
наставляяй,
Радуйся, добрый соработниче Христов и верный
Того учениче.
Радуйся, священномучениче Фаддее,
молитвенниче о душах наших!

Кондак 8

Странное чудо является притекающим к тебе,
блаженне Фаддее, ибо данною тебе Божиею
благодатию во дни печали и скорбных
обстояний светлым лицом радость пасхальную
всем возвещал еси, воспевая Богу: Аллилуйя!

Икос 8

Весь хвала Богу и жертва живая был еси, святе
Фаддее, глаголаи бо еси, яко крестный путь
спасения благодать Божия радостию
преисполняет, юже мир не позна. Сего ради от
святителя Тихона святость твоя известися, юже
похваляюще, воспеваем ти сицевая:
Радуйся, странствия Владычня возследователю,
Радуйся, бессмертныя трапезы Христовы
насладивыйся;

Радуйся, яко во страданиях Господеви
уподобился еси,
Радуйся, яко клеветы, осуждение и заточение
понесл еси;
Радуйся, яко во узилищи с тобою сущия утешал
еси,
Радуйся, уныние и скорбь далече от них отревал
еси;
Радуйся, дар прозорливости от Господа
получивый,
Радуйся, и в темници милостыню творивый.
Радуйся, священномучениче Фаддее,
молитвенниче о душах наших!

Кондак 9

Всякия утоляя печали, безмездник предивный
явился еси, сирым и нищим вся раздавая, да
обет нестяжания совершение исполниши. О сем
же людие земли астраханския зело чудишася,
егда вольную нищету твою узрели суть,
умиленным сердцем воспевая Богу: Аллилуйя!

Икос 9

Ветия суемудренныя нечестивыя видим твоим
житием посрамляемыя, богомудре Фаддее;
поправшия бо каноны церковныя и отеческия
предания ко Христу привел еси, не словесы
грозными заблудшия обличая, но

богоподражательными своими нравы. Сего ради
вопием ти:

Радуйся, на всяк день у Престола Господня
молитвы возносивый,

Радуйся, словом богоносным паству свою
неустанно учивый;

Радуйся, вся покрывающую любовь имевый,

Радуйся, светом Христовым заблуждшия
просветивый;

Радуйся, отцев Вселенских соборов верный
последователю,

Радуйся, еще в житии земном за святость
почитаемый;

Радуйся, зерно Божественныя истины
возрастивый,

Радуйся, преславное Российския земли
заступление.

Радуйся, священномучениче Фаддее,
молитвенниче о душах наших!

Кондак 10

Спаستися хотя всякому, притекающему к тебе,
наставниче добрый, страждущих яко слуга
Христов принимал еси, раны греховныя тех
исцеляя и волю Божию им открывая, воспевая
Богу: Аллилуйя!

Икос 10

Стена еси всем прибегающим к тебе,
богопросвещенне Фаддее, во дни бо лютых
гонений Тверь град молитвою твоею ограждая,
призывал еси люди твоя верными быти Христу
даже до смерти, да жительствуют по словеси
Евангельскому: "Не убойтесь от убивающих тело,
души же не могущих убить". Укрепи же и нас,
малодушных и унылых, зовущих ти таковая:
Радуйся, всяческия поношения смиренно
претерпевый,
Радуйся, тя бо ни скорбь, ни теснота, ни глад, ни
нагота, ни меч не устрашиша;
Радуйся, яко сия вся от любви Христовы ты не
отлучиша,
Радуйся, ветве лозы Христовы, сторичный плод
принесшая;
Радуйся, душу твою молитвою и любовью
окриливый,
Радуйся, в мире многомятежном, яко в тишей
пустыни поживый;
Радуйся, святителей пресветлое украшение,
Радуйся, всем верным прерадостное утешение.
Радуйся, священномучениче Фаддее,
молитвенниче о душах наших!

Кондак 11

Пение хвалебное возносим ти,
священномучениче Фаддее; течение скончав,
веру соблюл еси, тесным путем в житии твоём
шествуя, душу твою молитвою и постом
предуготовал и безкровным самозакланием
венец мученический прежде кончины твоея
стяжал еси, воспевая Богу: Аллилуйя!

Икос 11

Светом небесныя благодати зримо, святе,
просиял еси, заушения и заплевания в темници
претерпевая, егда Владычица Пречистая за тя
заступися и мучителей к покаянию приведе.
Темже юдоль плача в гору святую претворися,
мы же воспеваем ти сицевая:
Радуйся, светом Фаворским пред кончиною
своею возблиставый,
Радуйся, всецело себе Богу предавый;
Радуйся, возвеселивый ангелы своими подвиги,
Радуйся, яко скорбь твоя в радость преложися;
Радуйся, ты бо соделал еси душу свою храмом
Бога Живаго,
Радуйся, яко венца трегубаго в
преподобничестве, святительстве и
мученичестве, сподобился еси;
Радуйся наставниче и учителю, душу свою за
други своя положивый,

Радуйся, и за враги своя смиренно Господа моливый.

Радуйся, священномучениче Фаддее, молитвенниче о душах наших!

Кондак 12

Благодать свыше ти данную сведуще, восхваляем мученическую кончину твою, преблаженне Фаддее, ты бо прослави Христа на земли жизнью, паче же смертью своею, по кончине же своей славою небесною осиянный, токи исцелений нам присно источаеши. Мы же, прославляя Бога, дивнаго во святых своих, воззовем Ему: Аллилуйя!

Икос 12

Воспеваем тя, чудотворца новаго и преславнаго, достохвальне Фаддее, за Христа бо страданием твоим в радость вечную вшел еси, и ныне во свете неприступнем пребываеши, лицезрения Троицы Присносущныя наслаждаяся и со ангелы и всеми святыми у Престола Божия ликуя, идеже и нас помяни, вопиющих ти таковая: Радуйся, от мученик древних ничимже умаленный, Радуйся, святче Божий, возсиявый силою и духом древних отцев;

Радуйся, в сонм новомучеников российских
вчиненный,
Радуйся, мощи твоя святые нам, недостойным,
явивый;
Радуйся, яко честныя мощи твоя всем исцеления
источают,
Радуйся, яко мощи твоя граду Твери и всей
Российстей земликрепкое заступление;
Радуйся, присно радование всем возглашати
призывающий,
Радуйся, яко по имени твоему и житие твое
бысть.
Радуйся, священномучениче Фаддее,
молитвенниче о душах наших!

Кондак 13

О заступниче наш у престола Царя Небеснаго,
священномучениче славный Фаддее, веры
православныя твердый поборниче и за
Отечество наше присный молитвенниче!
Нынешнее наше приими приношение, да
молитвами твоими вечныя муки избавимся, и
Небесныя радости сподобимся, воспевая Богу:
Аллилуйя! (Сей кондак читается трижды, затем
чтется икос 1 и кондак 1).



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

I

**НОВОЕ
* НЕБО**